

29 Maart 2023, vir onmiddellike gebruik

MEDIAVERKLARING

Simposium fokus op sake wat stukrag gee vir die graanpad vorentoe

Die uitvoer van landbouprodukte is een van die weinige middele wat steeds 'n positiewe bydrae tot groei in die land se ekonomie maak. Graan is 'n integrale deel binne die waardeketting van landbou en hou nog Suid-Afrika se deure oop, het Hein Rehr, president van die Graanhanteringsorganisasie van Suider-Afrika (GOSA) op die organisasie se 38ste simposium in Mosselbaai gesê.

“Landbou op sy eie gaan nie alleen die land weer bring na waar hy was nie. Die privaat sektor sal drasties moet ingryp en hande sal gevat moet word met georganiseerde landbou sodat die ekonomie weer kan begin presteer. Hoe moeiliker dit gaan, hoe meer moet ons praat en hoe meer dinge sal ons saam moet doen,” het Rehr gesê.

Die simposium – waartydens die organisasie se 40ste bestaansjaar ook gevier is – is op 15 en 16 Maart by die Diaz Hotel in Mosselbaai aangebied. Dit is voorafgegaan deur 'n informele gholfdag by Mosselbaai Gholflklub op 14 Maart en 'n sake-ontbyt met Pieter-Louis Myburgh, bekroonde ondersoekende joernalis en outeur, op 15 Maart. 'n Damesprogram is gelyklopend met die simposium aangebied.

Die tema en program het die kollig geplaas op watter aspekte nodig is om stukrag aan die graanbedryf in 'n ná-pandemie-era te verleen. Die onafhanklike energie-analis, Chris Yelland, was die hoofspreker. Ander sprekers was Dawie Maree (FNB Landbou), dr André van der Vyver (SACOTA), Japie Snyman (Olam Agri) en dr David Molapo was die motiveringspreker. Drie graanspesifieke wegbreek-werkswinkels is gelei deur Wayne van Vuuren (Massamatic), Willem Strauss (RMB) en Jackie Goodwin (SABT).

Die nuwe normaal

Volgens Chris Yelland moet beurtkrag nie aanvaar word of die nuwe normaal vir Suid-Afrika word nie. Toewyding deur alle groot, medium en klein belanghebbendes kan verseker dat beurtkrag binne twee jaar beëindig word vandat die groen lig gekry word om voort te gaan met alternatiewe oplossings. “Klante, insluitend dié in die landbousektor, behoort eienaarskap van hul energietoekoms te neem en deel van die oplossing te word. 'n Algehele verduistering (total blackout) is baie onwaarskynlik, want verskeie stappe kan gedoen word om dit te verhoed,” het hy gesê.

Landbou word sterker

“Die Suid-Afrikaanse landbou het ekonomiese terugslae in en ná die Covid-19-pandemie oorleef en in 2022 25% beter presteer as in 2019. Dit maak landbou een van die min bedrywe wat dit kon vermag,” aldus Dawie Maree. Hy reken landbou sal moet aanpas om te oorleef: “Ons moet besluit wie ons wil wees. Ons moet relevant bly, aanpas om in die mark te bly en ingelig bly. Fokus op dit wat jy kan beheer. Moenie anderkant toe kyk as daar 'n probleem is nie. Wees innoverend en gebruik wat jy kan beheer en bekostig.”

Uitvoer bly belangrik

“Sojabone is nie – soos witmielies – voorheen uitgevoer nie, maar sedert die produksie die vraag oorskry, word sojabone ook uitgevoer. Die uitvoermark is uiters belangrik om die Suid-Afrikaanse landbou en ekonomie te stimuleer en te laat groei. Daarom is elke aspek van die uitvoer van produkte belangrik om winsgewendheid te behou,” het dr André van der Vyver gesê. Hy het ook daarop gewys dat die standaardisering van die uitlaaivermoë van JSE-goedgekeurde silo’s nodig is om ’n prys op die ekonomiese waarde van die graan in die silo te plaas.

SA en die uitvoermark

Volgens Japie Snyman is Suid-Afrika met sy vermoë om 350 000 tot 400 000 ton graan per maand uit te voer, ’n klein rolspeler in die wêreld ekonomie, maar ding steeds met die beste ter wêreld mee. Die internasionale uitvoermark is baie mededingend, maar Suid-Afrika se grootste voordeel is sy ligging.

“Suid-Afrika is in ’n goeie posisie met ’n groot voordeel van veerkragtigheid. Produsente kán planne maak en doen goed, al is die infrastruktuur ’n uitdaging. As ons konstant meer produseer en self verwerk en verbruik, is daar baie voordele,” het hy bygevoeg.

Rondetafelgesprek

’n Hoogtepunt was ’n rondetafelgesprek met die sprekers wat deur Lourensa Eckard van *In Gesprek* op kykNET gelei is. Sake soos hoe om die uitvoer van landbouprodukte doeltreffender te maak, hoe banke verbruikers van elektrisiteit bystaan om hernubare energie te kry, en die invloed van beurtkrag en hoe om die probleem op te los, is bespreek. Meer as een paneellid het melding gemaak van die belangrikheid van gesprek- en netwerkplatforms, soos dié wat die GOSA-simposium bied.

GOSA bedank graag vir Bessemer Africa as hoofborg van die simposium.

GOSA 1:

Die lede van die paneelbespreking gelei deur Lourensa Eckard van kykNET (middel), was van links: Japie Snyman (Olam Agri), dr André van der Vyver (SACOTA), Dawie Maree (FNB Landbou) en die onafhanklike energie-analis, Chris Yelland (EE Business Intelligence).

GOSA 2:

Tydens die 40-jaar galadinee is erkenning gegee aan oudraadslede van GOSA wat die simposium bygewoon het. Hier is Hein Rehr (president) by Annatjie Loio (vorige president), De la Rey Knoblauch (oudraadslid) en Carl Geldenhuys, een van die organisasie se stigterslede.

EINDE

UITGEREIK NAMENS DIE GRAANHANTERINGSORGANISASIE VAN SUIDER-AFRIKA (GOSA) DEUR INFOWORKS OP 29 MAART 2023.

WWW.GRAINORGSA.CO.ZA

Navrae: Hein Rehr, president van GOSA

Sel: 082 451 1569

hein@newachiever.net

Medianavrae: Johan Smit, Infoworks

Tel: 018 468 2716

Sel: 082 553 7806

johan@infoworks.biz